



САЙЛАУШЫЛАР
ТІЛЕГІН ТЫҢДАДЫ

4-БЕТ | МӘСЛИХАТҚА – 30 ЖЫЛ



ҒАСЫР ҚАСІРЕТІНЕН
ҚҰТҚАРҒАН ҚАДАМ

8-БЕТ | ҚОҒАМ



«АБАЙ-ТОҒЖАНМЕН»
АШЫЛАДЫ

12-БЕТ | МӘДЕНИЕТ



Қасым-Жомарт ТОҚАЕВ,
ҚАЗАҚСТАН РЕСПУБЛИКАСЫНЫҢ ПРЕЗИДЕНТІ:

Ата заң – мемлекеттілігіміздің мызғымас тірегі әрі еліміздің саяси және қоғамдық құрылысын, айнымас құндылықтары мен даму жолындағы стратегиялық бағыт-бағдарын айқындайтын басты құжатымыз. Жалпыұлттық референдум арқылы жаңартылған Конституциямыз ұлтты ұйыстырудың нағыз символына айналды. Сондай-ақ негізгі заңымыз елдің саяси жүйесін демократияландырды, заң үстемдігін қамтамасыз етуді және халықтың әл-ауқатын арттыруды көздейтін ауқымды өзгерістердің берік тұғыры саналады.

№103-104
(4692)

Бейсенбі
29 тамыз
2024 жыл



ASTANA

ELORDA
AQPARAT
МЕДИА ХОЛДИНГІ

РЕСПУБЛИКАЛЫҚ ҚОҒАМДЫҚ-САЯСИ ГАЗЕТ

A Q S H A M Y

1990 ЖЫЛҒЫ 13 ҚАЗАННАН БАСТАП ШЫҒАДЫ



Президент шетелдік спортшыларға азаматтық беріп, ел атынан додаға қосу тәжірибесін доғару керек екенін айтты.

Спорттық қауымдастықтар мықты спортшыларды іріктеп, кәсіби тұрғыдан өсірудің оңтайлы жолын таппай келеді. Соның салдарынан нағыз дарынды жастар көзге ілінбей, жолы ашылмай қалады. Сондықтан ел ішіндегі түрлі жарыстарда әділдік болуын қамтамасыз ету керек. Мемлекет басшысы қазіргі жағдайға қарағанда, спорт функционерлері саланы дамытумен емес, миллиардтаған бюджет қаржысын игерумен әлектенгенін ашық айтты.

Президент осы саладағы ең түйткілді мәселелерді батыл айтып, шешілу жолдарын ұсынды.

2



28 МЫҢ БАЛА 1-СЫНЫПҚА БАРАДЫ

1 қыркүйек – Білім күні елімізде жаңа оқу жылы басталады. Айтулы күні Астанадағы жалпы білім беретін 110 мемлекеттік, 70 жекеменшік және 7 республикалық мектепте алғашқы қоңырау салтанаты өтеді.

Елордалық білім беру ұйымдарында жалпы 282 150 оқушы білім алатын болады. Биыл бас қалада 28 мыңнан астам бала 1-сыныптың табалдырығын Әнұран айтып аттайды. Жаңашылдықтары көп жаңа оқу жылында 24 «Жайлы мектеп» салынады. Жыл соңына дейін 21 мектеп ашылады.

5



30 ТАМЫЗ ҚАЗАҚСТАН РЕСПУБЛИКАСЫНЫҢ КОНСТИТУЦИЯСЫ КҮНІ!

Құрметті елорда тұрғындары мен қонақтары!

Сіздерді Қазақстан Республикасының Конституциясы күнімен құттықтаймын!
Конституция – біздің мемлекеттілігіміздің басты тұғыры, халқымыздың бірлігі мен дамуының символы. Ол әр азаматтың құқығы мен бостандығын белгілейді, әрі еліміздегі әділеттілік пен құқықтық тәртіптің кепілі саналады. Бүгін осы маңызды күнді атап өту арқылы құндылықтарымызға құрмет танытамыз: бейбітшілік, тұрақтылық, заңдылық және әр адамның құқығын құрметтеу.
Қазақстан Республикасының Конституциясы – бізді жарқын болашаққа ұмтылуда алға жетелейтін құжат. Ол бізге әлеуетімізді жүзеге асыруда және даму жолында үлкен мүмкіндіктер ашады, сол сияқты ел игілігі жолында атқаратын ісімізге бағыт-бағдар береді.
Баршаңызға зор денсаулық, отбасыларыңызға амандық және бастамаларыңызға сәттілік тілеймін! Әрбір күн сіздерге қуаныш пен жаңа жетістіктерге толы болсын! Ал еліміз өз азаматтарының игілігі үшін дамып, өркендей берсін! Конституция күні құтты болсын!

Жеңіс ҚАСЫМБЕК,
Астана қаласының әкімі

ҚАУІПСІЗДІК КЕҢЕСІНІҢ ОТЫРЫСЫН ӨТКІЗДІ



Президент Қасым-Жомарт Тоқаевтың төрағалығымен Қазақстан Республикасы Қауіпсіздік Кеңесінің шұғыл отырысы өтті.

Жиында Ұлттық қауіпсіздік комитетінің төрағасы Ермек Сағымбаев, Ішкі істер министрі Ержан Сәденов және Бас прокурор Берік Асыл

қазіргі халықаралық жағдайды ескере отырып, экстремизм мен терроризмге қарсы әрекет етудің өзекті мәселелері жөнінде баяндады. Отырыс барысын-

да құқық қорғау және арнайы органдар қызметінің терроризмге қарсы күресті күшейту бойынша түрлі аспектілері қарастырылды. Мемлекет басшысы ел азаматтарының қауіпсіздігін қамтамасыз ету шараларын арттыруға бағытталған бірқатар нақты тапсырма берді.

БҰҰ ӨКІЛІМЕН КЕЗДЕСТІ

Мемлекет басшысы Қасым-Жомарт Тоқаев БҰҰ Бас хатшысының орынбасары, Қарусыздану мәселелері жөніндегі жоғарғы өкіл Изуми Накамицуды қабылдады. Кездесу барысында аймақтық және халықаралық қауіпсіздікті қамтамасыз ету, қарусыздану мен ядролық қаруды таратпау ісінде Қазақстанның БҰҰ институттарымен жан-жақты ықпалдастығының перспективалары талқыланды.

Мемлекет басшысы БҰҰ Бас хатшысының орынбасарына ілтипат білдіре отырып, Ұйым қазіргі заманның өзекті проблемаларын шешуде айрықша рөл атқаратынын және оның орнын ешқандай құрылым алмастыра алмайтынын атап өтті.

– Қазақстанның қарусыздану және жаппай қырып-жоятын қаруларды та-

ратпау мәселесіне қатысты ұстанымы берік. Қазіргі әлемде болып жатқан оқиғалар тұрғысынан алғанда, бұл мәселелердің өзектілігі мен маңыздылығы арта түсті. Мұның алаңдаушылық туғызатынын сөзсіз. Ертең біз Халықаралық ядролық сынақтарға қарсы іс-қимыл күнін атап өтеміз. Бұл – бүкіл адамзат баласына ядролық

сынақтар жүргізудің әрі ядролық қаруды қолданудың қауіпті екенін еске салатын өте маңызды дата. Еліміз БҰҰ институттарымен тығыз байланыс орнатуға бейіл әрі Ұйымды баламасы жоқ, әмбебап халықаралық құрылым ретінде қарастырады, – деді Президент.

Өз кезегінде Изуми Накамицу Қазақстанның ядролық қаруды таратпау жөніндегі жаһандық үдерісте көшбасшылығын жоғары бағалады. Сондай-ақ еліміздің орта держава ретіндегі рөлі артып келе жатқанын ерекше атап өтті.

Кездесуде Қасым-Жомарт Тоқаев пен Изуми Накамицу халықаралық күн тәртібіндегі өзекті мәселелер туралы пікір алмасты.

БІРЛЕСКЕН ОТЫРЫСЫ ӨТЕДІ

Парламент палаталарының бірлескен отырысы алдағы дүйсенбі, яғни 2 қыркүйек күні өтеді. Мәжіліс төрағасы Ерлан Қошанов Қазақстан Республикасы Парламенті палаталарының бірлескен отырысын шақыру туралы өкімге қол қойды. Бұл туралы 2024 жылғы 28 тамызда Қазақстан Республикасы Парламенті Мәжілісінің баспасөз қызметі хабарлады.

БАЛАЛАРҒА МЕКТЕП ҚҰРАЛДАРЫ ТАБЫСТАЛДЫ



Amanat партиясының Астана қалалық филиалының ұйымдастырумен «Баланы мектепке даярлайық!» қайырымдылық акциясы өтті. Акция аясында елордалық 60-қа жуық отбасыға мектеп сөмкелері мен кеңсе тауарлары үлестірілді.

Индира БЕРЖАНОВА

Игілігі мол іс-шараға Amanat партиясы Астана қалалық филиалының атқарушы хатшысы Мұхаммед Болысбек, мәслихат төрағасы Ерлан Каналимов, елордалық мәслихат депутаты Мәдина Әжікенова, саяси партияның аудан хатшылары, астаналық

ата-аналар мен оқушылар қатысты.

«2014 жылдан бері дәстүрлі түрде партияның «Бақытты отбасы» жобасы жүзеге асып келеді. Аталмыш жоба негізінде «Баланы мектепке даярлайық!» қайырымдылық акциясы қатар өткізілуде. Сұранысы көп жобаға қатысу үшін Amanat партиясы Астана қалалық филиалына 1250 өтініш келіп түссе, бүгінде 750 отбасыға

қолдау көрсетіледі. Еліміздің барлық өңірін қамтыған жобаның маңызы мен мәні зор. Халықтың әлеуметтік осал тобынан шыққан балалардың оқуға бастар қадамы қуанышқа толы болуы үшін оларды мектепке даярлап, жан-жақты көмек көрсету ісінде әркім азаматтық белсенділік танытатынына сенімдімін. Салауатты, сәтті әрі бақытты өмір негізі балалық шақта қаланды. Балалардың дамуына қолдау көрсету – қоғамның басты мақсаты» деді өз сөзінде Amanat партиясы Астана қалалық филиалының атқарушы хатшысы Мұхаммед Болысбек.

Amanat-тың елордалық филиалында салтанатты жағдайда тағы 50 рюкзак табысталды. Әр рюкзактың ішіндегі заттар оқу жылы бойына жететіндей етіп жасалған. Қазіргі таңда Астанада шамамен 3 мың оқушы көмек алды. 30 қыркүйекке дейін жалғасатын акция аяқталғанға дейін тағы 8 мың баланың қамтылуы жоспарлануда.

Акцияның игілігін көрген жандардың бірі, елордалық тұрғын әрі көпбалалы ана – Гүлнәр Ақтаева.

«Менің төрт балам бар. Оның екеуі – мектеп жасында. Балаларыма екінші жыл қатарынан екі мектеп сөмкесі мен керек-жарағын алып келемін. Акцияға қатысу үшін арнайы өтініш жазып, қабылдандым. Қазірде екі баланың мектеп сөмкесі мен кеңсе тауарын сатып алудың өзінде кемі 80 мың теңге қаржы жұмсалды. Сондықтан Amanat партиясы ұйымдастырған акцияның қолдауы көп. Білім күні қарсаңында жаңа құрал-жабдықтарды алғанына балаларым мәз, мектепке қуана баратын болды. Ұйымдастырушыларға алғысымды білдіре, жоба жалғасын таба берсін деймін» деді Г.Ақтаева.

Құрметті елорда тұрғындары мен қонақтары!

Сіздерді еліміздің басты мерекелерінің бірі – Қазақстан Республикасының Конституциясы күнімен шын жүректен құттықтаймын! Конституция – біздің негізгі Заңымыз елдегі тұрақтылықтың, бейбітшілік пен келісімнің кепілі, мемлекетіміздің демократиялық дамуының мызғымас іргетасы!

Біздің Конституциямыз азаматтарға негізгі құқықтар мен бостандықтарды кепілдендіреді. Осы Заңның арқасында еліміздің даму жолында біз тұрақтылық, келісім және өркендеу бағытымен нық қадам басудамыз.

Сіздерге ашық аспан, келісім мен тұрақтылық тілеймін, әрбір отбасында бақыт пен береке орнасын, ал Отанымыздың гүлденуі жолында жаңа жеңістерге ұмтылуымыз үлкен табыстарға жетелей берсін!

Е.КАНАЛИМОВ,
Астана қаласы мәслихатының төрағасы

Құрметті астаналықтар!

Сіздерді Конституция күнімен шын жүректен құттықтаймыз! Бірлігі жарасқан Қазақстан халқының ілгері дамуының іргелі қағидаларын жариялаған еліміздің бас заңы уақыт сынынан сүрінбей өтіп, өзінің өміршеңдігін дәлелдеді.

Соның арқасында Қазақстан бүгінде халықаралық қауымдастықта лайықты орынға ие болып отыр. Әрбір азамат Конституцияның мемлекет пен қоғам үшін ғана емес, өзі үшін де, отбасы үшін де маңыздылығын терең сезінеді.

Басты құндылықтарымыз – Тәуелсіздік, Бірлік және Тұрақтылық жылдан жылға нығая берсін. Сіздерге және Сіздердің жақындарыңызға денсаулық, ортақ үйімізге тыныштық пен гүлденуді тілейміз!

Құрметпен, Сансызбай ЕСІЛОВ,
«Ардагерлер ұйымы» РҚБ
Астана қалалық филиалының төрағасы

Құрметті елорда тұрғындары мен қонақтары!

Сіздерді тәуелсіз еліміздің басты мерекесі – Қазақстан Республикасының Конституциясы күнімен шын жүректен құттықтаймын! Бұл күн – халқымыз үшін аса қастерлі, ең ұлық мереке. Бүкілхалықтық дауыс беру арқылы қабылданған Ата Заңымыз өркенетті мемлекеттің барлығына тән демократиялық қағидалармен толық қамтылды.

Конституция – бірлік пен тұрақтылықтың, мемлекеттік құрылым мен тұтастықтың символы және әрбір азаматтың өзін тең сезінуі мен құқықтарын сақтауына берік негіз болды.

Ата Заңымызға деген ерекше құрмет – біздің сеніміміз бен күшіміздің қайнар көзі.

Конституциямызда бекітілген басты құндылықтар елдегі жүзеге асырылып жатқан реформаларды батыл еңсеріп, болашаққа деген нық сенімге бастайды.

Құрметті елорда тұрғындары мен қонақтары!

Осынау мәні терең, мерейлі мерекемен баршаңызды құттықтай отырып, Сіздерге зор денсаулық, отбасыларыңызға амандық, ел болашағы мен халық игілігі жолындағы істеріңізге сәттілік тілеймін.

Зулфухар ҒАЙЫПОВ,
Астана қаласы Қоғамдық кеңесінің төрағасы

ТҰРҒЫН ҮЙ МАҢЫ ТАЗАРАДЫ

Елордада Таза Қазақстан ауқымды экологиялық акциясы аясында «Таза Астана» әлеуметтік жобасы басталды. Бұл тұрғын үй маңын абаттандыру, көгалдандыру, санитарлық тазалау, аулада тазалық жұмыстарын жүргізу, балалар алаңдарының тозығы жеткен жерлерін жөндеу бойынша жүйелі жұмыс құруға бағытталған.

Жоба аясында арнайы құрылған экологиялық комиссия тоқсан сайын «Ең таза аула», «Ең үздік кәсіпорын», «Ең үздік мекеме» атақтарын белгілейді. Таза Астана жобасы шеңберінде бағалау актісі бойынша МИБ/ПИК/ЖШС басшыларының өтінімі бойынша тоқсан сайын арнайы құрылған экологиялық комиссия қатысушылар үшін номинацияларды айқындайтын болады. Аумақты тексеру үшін жобаға қатысу ерікті болып саналады. Нәтижелер негізінде «Сапалы басқарушы», «Таза аула», «Креативті мердігер», «Қауіпсіз аула», «Тату аула», «Сенімді мердігер», «Жайлы орта», «Таза орта», «Жасыл орта» номинациялары беріледі. Өтінімдер birge.astana.kz платформасында қабылданады. Жобаның алғашқы күні тұрғын үй иелерінің балаларына арналған анимациялық шоу бағдарлама ұйымдастырылды. Мұнда олар тазалық тақырыбына арналған ойын-сауық әрі танымдық ойындар ойнады. Бүгін елордалықтарға түсіндіру жұмыстары өтті. Ал экологиялық комиссияның алғашқы жұмысы 30 тамызда басталады. Сондай-ақ жасыл желектерді күтіп ұстау және отырғызу, сауда нысандарына іргелес аумақтарды жинау, көгалдар мен гүлзарларды орнату, рұқсат етілмеген полигондарды жою жұмыстары жүргізілуде.





ӘДІЛЕТТІ ҚАЗАҚСТАН КОНСТИТУЦИЯЛЫҚ РЕФОРМАДАН БАСТАУ АЛДЫ

Референдум – тікелей демократия институты. Онда азаматтар дауыс беру арқылы мемлекет пен қоғам үшін маңызды мәселеге пікір білдіреді. Референдум институты Ежелгі Рим мемлекетінде дүниеге келді деп жатамыз. Дегенмен, тікелей демократияның осы институтының отаны – Швейцария. 1848, 1874 және 1989 жылдардағы шаттық заңдарына референдум көрініс тапқан. 1848 жылдан бастап жалпы халықтық дауыс беру тұрақты қолданылып келген.

Референдумның 4 функциясы бар: заң шығарушы, елдің саяси өмірінің барометрі, конституциялық даулы сұрақтың арбитраждық шешімдік құрал.

Қазақстанда референдум институты мемлекеттік-құқықтық практикаға жақында енгізілді. КСРО кезінде барлық конституцияда бекітілген, бірақ іс жүзінде қолданылмады. 1991 жылы наурызда КСРО тарихындағы алғашқы және соңғы референдум өтіп, онда Одақты сақтау туралы мәселе қаралды. Алайда референдум кеңестік билікті құлдыраудан құтқара алмады.

1993 жылы бірінші Конституцияда бұл институт құқықтық тұрғыда бекітілді. Заңдар жинағында мемлекет өміріндегі маңызды мәселелерді шешуде референдум өткізу мүмкіндігі қарастырылды. Осы Ережені негізге алып, 1995 жылы екі республикалық референдум өткізілді. Біріншісі – 29 сәуірде Президенттің өкілеттігін ұзарту, екіншісі – 30 тамызда Конституция қабылдау.

1995 жылғы Конституциясында, кейіннен «Республикалық референдум туралы» Конституциялық заңында толыққанды бекітілді. 2022 жылы 5 маусымда



Конституцияның 1-бабында Қазақстанның ең қымбат қазынасы – адам және адамның өмірі, құқықтары мен бостандықтары деп айқын көрсетілген. Яғни елдің басты құндылығы – адам. Біздің елдегі заңдардың барлығы адамдардың өмір сүру сапасын арттырып, жайлылық туғызуға бағытталған. 2022 жылғы 5 маусымда өткен республикалық референдумнан кейін Конституцияда бірқатар өзгерістер орын алып, елді демократияландырып, саяси және қоғамдық өмірге қарапайым азаматтардың белсенді қатысуына жол ашылды.

Конституцияға өзгерістер мен толықтырулар енгізу көздеп, үшінші референдум өткізілді.

Референдумды ұйымдастыру, дайындау және өткізу ашық және жария түрде жүзеге асырылды. Референдум өткізу туралы қойылған мәселелер БАҚ арқылы азаматтардың назарына жеткізілді.

Жалпы дауыс беру құқығы бар 11 734 642 азаматтың 7 985 769-ы референдумға қатысып, өз таңдауын жасады. Дауыс берушілердің келу

көрсеткіші 68,05 пайыз құрады. Оның ішінде азаматтардың 77,18 пайызы (6 163 516 адам) Конституцияға өзгерістер енгізуге дауыс берді. Сөйтіп, Қазақстан тарихында екінші рет референдум арқылы Конституцияға өзгерістер мен толықтырулар енгізілді.

Негізгі өзгерістерге тоқталатын болсақ: – Қазақстан суперпрезиденттік басқару формасынан күшті Парламенті бар Президенттік

формаға көшеді; – Жер және оның қойнауы, су көздері, өсімдіктер мен жануарлар дүниесі, басқа да табиғи ресурстар халыққа тиесілі; – Президенттің жақын туыстарының саяси мемлекеттік қызметші, квазимемлекеттік сектор субъектісі басшылары лауазымдарын атқаруға құқығы жоқ; – Қазақстандықтар өз бетінше Конституциялық сотқа жүгіне алады;

– Өлім жазасына тыйым салынады. Ешкімнің адам өмірін қиюға құқығы жоқ; – Мәжілістің депутаттық корпусы аралас сайлау жүйесі бойынша құрылады; – Сенаттағы президенттік квота қысқарады, мәжілістегі ҚХА квотасы жойылады; – Мажоритарлық жүйе депутатты сайлаушылардың қалауы бойынша шақыртып алуға мүмкіндік береді; – Жоғары есеп палатасын құру; – Адам құқықтары институттарын нығайту; – Облыстардың, республикалық маңызы бар қалалардың және астананың әкімдерін тағайындау тәртібін өзгерту; – Тұңғыш Президенттің ерек-

ше рөлі мен артықшылықтары туралы ережелер алып тасталады.

Аталған өзгерістерді тереңірек талдайтын болсақ, бірінші кезекте, халықтың сайлау, шешім шығару құқығының жаңа көрінісі ретінде мәслихат депутаттарының рөлі күшейтілгенін айту керек. Енді халықтың ресми өкілдерінің жалпы санының кемінде бестен бірінші бастамасы бойынша әкімге сенімсіздік білдіріліп, облыс, республикалық маңызы бар қалалардың әкімдерді қызметтен босату тетігі қарастырылды. Бұл өзгерістер әкімдердің іске жауапкершілікпен қарап, халыққа шынайы қызмет етіп, үнемі есеп беруіне негіз болады деп есептейміз.

Сенат жұмысы Мәжіліс қабылдаған жобаларға келісім беру болмаса бермеумен шектелді. Яғни төменгі палатада қаралған нормаларды Сенат қайта қарап талдамайды. Барлық Конституциялық заңдар Мәжілістің қарауынан өтеді. Бұл аралас сайлау жүйесі бойынша сайланған таңдаулы депутаттық корпусы қалыптастырып, күшті Парламент институтын дамытып, халықтың сайланбалы органға сенімін күшейтіп, халықтың қоғамға көзқарасы өзгерді, қоғамдық тәртіптің деңгейі жоғарылайды, болашаққа деген сенім артады.

Бұған дейін шетелдік азаматтар мен компания өкілдеріне жер сатылмасын деген халықтың пікірі ұдайы естіліп тұратын. Конституциялық өзгерістерден кейін «Жер және оның қойнауы, су көздері, өсімдіктер мен жануарлар дүниесі, басқа да табиғи ресурстар халыққа тиесілі» деген тайға таңба етілгендей көрсетіп, жер халықтыкі екені айқындалды. Жер халықтың негізгі ресурсы әрі байлағы ретінде бағаланатын болады.

Ендігі ең маңызды қадам референдумнан бастау алған осы өзгерістер мен бастамаларды құзырлы органдар уақытында сапалы орындап, халық бақылаушылық белсенділігін арттырғаны абзал. Сонда елдегі демократиялық құндылықтар шынайы іске асып, заң нормалары қоғам үшін қызмет ететін болады.

Үнзила ШАПАҚ,
ҚР Парламенті
Мәжілісінің депутаты

МЕРЕЙЛІ КҮНГЕ ҚҰРМЕТ

Алматы ауданы әкімдігінің қолдауымен аталған аудан ардагерлерінің ұйымдастыруымен «Қазақ елі» монументінің жанында Қазақстан Республикасының Конституция күніне арналған «Менің Қазақстаным» атты флешмоб өтті.

Шапағат ӘБДІР

Бес жүзге жуық ардагер қатысқан флешмобта Астана ардагерлері өздерінің Отанға деген құрметін көрсету мақсатында қыран бүркіт және күн формасында жиналып көрініс шығарды және де патриоттық әндер айтып, би биледі.

Сондай-ақ ұйымдастырушылар аталған іс-шараның басты мақсаты – көпшілікті бірлікке, елдікке ұйыстыратынын айтып өтті.

– Ата Заң күніне орай ұйымдастырылып жатқан бұл флешмобқа ардагерлеріміз атсалысып жатыр. Жалпы біздің Ата Заңымыздың тарихы тым арыда. Бұл Заң Президент Қ.Тоқаевтың басшылығымен Әділетті Қазақстан құруға, елде демократия негіз-



дерін орнықтыруға бағытталған. «Тәртіпке бағынған құл болмайды» деп батыр Бауыржан Момышұлы айтпақшы, заңмен жүрген адам да, ұлт та азғындамасы анық. Сондықтан да Ата Заң күні біздің еркіндігіміздің, қоғамдағы әділдік пен ақиқаттың салтанат құратын күні деп бағалауға болады. Бұл – Әділетті Қазақстанның ортақ мерекесі, – дейді Алматы ауданы Ардагерлер кеңесінің төрағасы Марат Мұстафин.

Ал іс-шараның басы-қасында жүрген зейнеткерлер адамдарды бір жерге, бір идея төңірегінде топтастырудың да оңайға соқпай-

тынын айтады. Сондай-ақ мұндай іс-шаралар патриоттық сезімді оятып, жастардың елге, жерге деген сүйіспеншілігін арттыруына септігін тигізетіндігін жеткізді.

– Бүгін астаналық ардагерлер ұлттық киім киіп, «Қазақ елі» монументінің алдына жиналып жатыр. Мұндағы мақсатымыз – Конституция күніне орай ұлттық санамызды жаңғырту. Жастарға тәрбиелік мәні бар жиналыс ұйымдастыру. Сондай-ақ «Жаңа Қазақстанның» жаңашылдығына зейнеткерлеріміздің де ілес алатындығын дәлелдеу. Бүгінгі іс-шараға қатысушылардың көбі

– салауатты өмір салтын ұстанған ардагерлер. Олардың осында жиналып, белсенділік танытуының өзі өмірге деген сауатты көзқараста екендіктерін айғақтайды. Сондықтан да мереке құтты болсын. Жастарымыз қарттарымыздан үлгі алып, Отан үшін аянбай еңбек ете берсін дегім келеді, – дейді ардагер ұйымдастырушы Раушан Исақова.

Аталған флешмоб биыл үшінші рет ұйымдастырылып отыр. Бірінші жылы 100-ге жуық, екінші жылы 300-ге таяу ардагерлердің қатысуымен өткен бұл флешмобқа 500-ге жуық адам қатысты.

2024 жылдың бірінші жартыжылдығында Конституциялық Сотқа азаматтардан 2000-нан астам өтініш келіп түсті.

ЖҮЙЕЛІ ЖҰМЫС НӘТИЖЕГЕ БАСТАЙДЫ

Өтініштерді талдайтын болсақ: – Заңның немесе өзге де нормативтік құқықтық актінің не олардың жекелеген ережелерінің Конституцияға сәйкестігін тексеру туралы – 25,2 пайыз (2023 жылы – 25 пайыз). – Сот актілерімен келіспеу туралы – 18,7 пайыз (2023 жылы – 42 пайыз). – Қолданыстағы заңнамаға өзгерістер мен толықтырулар енгізу туралы – 14 пайыз (2023 жылы – 5 пайыз). – Құқық қорғау органдары қызметкерлерінің әрекеттеріне шағыммен – 83 өтініш (2023 жылы – 59).

– Заңнама нормаларын түсіндіру туралы 81 өтініш (2023 жылы – 69) және басқа да мәселелермен жүгінді.

Ең көп өтініш Астана (386) және Алматы (229) қаласының, Ақмола облысының (175), Қарағанды облысының (152) және Шымкент қаласының (124) тұрғындарынан келіп түсті.

Қазір ел азаматтарының 112 өтінішін Конституциялық Сот Аппараты қарауда. 2024 жылдың бірінші жартыжылдығының қорытындысы бойынша Конституциялық Сот 39 шешім шығарды, оның ішінде азаматтардың Конституцияға сәйкестігін тексеру туралы 7 өтініші бойынша судьялар Үкіметке және уәкілетті органдарға заңнаманы жетілдіру жөніндегі ұсынымдармен қорытынды шешімдер қабылдады.

«Ядролық қарусыз әлем құру – бұл еліміздің аса маңызды басымдық берген бағыты. Осы ұлттылық қазақ халқының ұлттық бірегейлігінің ажырамас бөлігіне айналды. Ол бізге ядролық қаруды жоюға қатысты жаһандық қозғалыстың алғы шебінде болуға моральдық құқық берді».

Қазақстан Президенті Қасым-Жомарт Тоқаев БҰҰ Бас Ассамблеясының 74-сессиясында сөйлеген сөзі

Қалиакбар
ҮСЕМХАНҰЛЫ

Хиросимадағы жарылыстан бастап есептесек, адамзаттың ең алғашқы ядролық қарудан зардап шеккеніне биыл 80 жылға таяды. АҚШ-тың атом қаруын жасауы және оны 1945 жылы шілде айында сынақтан өткізіп, тамыз айының басында Жапонияға тастауы әлемдегі атом дағдарысына және ірі елдердің атом қаруын жарыса жасауына мұрындық болды.

АҚШ алғашқы атом қаруын қолданғаннан кейін АҚШ пен қара таласып келе жатқан Кеңес Одағы да ядролық қаруға ие болуға бар күшін салады. 1946 жылы ғалым Юлий Харитон алғашқы кеңестік атом бомбасын құрастыру мақсатында тактикалық-техникалық тапсырма әзірледі. Осы жылы үкімет шешімімен атом қаруын өңдеу және құрастыру жөніндегі алғашқы орталық ашылды. Осыдан кейін көп өтпей, Кеңес ядролық полигоны КСРО Министрлер кеңесінің шешімімен 1947 жылдың 21 тамызында Семей қаласының батысына қарай 170 шақырым қашықтықта құрылды. 1948 жылдың жазында алғашқы өндірістік атомдық реактор құрылысы аяқталды. 1949 жылдың 29 тамызында Семей полигонында ядролық қарудың ең алғашқы сынағы өткізілді. Міне, осы күннен бастап қазақ халқы да атомның зардабын тартты. 1953 жылдың 12 тамызында термо-ядролық қару, 1955 жылдың 22 қарашасында А.Сахаров құрастырған алғашқы сутегі бомбасы жарылды. 1962 жылға дейін сынақтар жер бетінде өткізілсе, 1963 жылдан бастап, жер астына көшірілді.

Деректерді саралағанда, 1949 жылдан 1991 жылға дейін Қазақстанда 500-ге жуық сынақ жасалып, сынақ алаңымен шекаралас аудандардағы халықтың денсаулығына, экологиялық ортаға орасан зор зиян келтірілді. Бірақ қызыл империя жергілікті халықтың бұл жағдайымен санақтан жоқ, 1963 жылы атмосферада, суда және ғарышта атом қаруын сынауды тоқтату жөніндегі келісімшартқа қол қойылса да, шарт талаптарын орындаған жоқ. Керісінше атом сынағы бейбітшілікке бағытталған, халыққа, қоршаған ортаға зияны жоқ деген екіжүзді сұрқия саясат ұстанып, жасырын сынақтарын жалғастыра берді. Міне, осы жағдайға байланысты Қазақстан КП Семей облыстық комитетінің сол кездегі бірінші хатшысы, мемлекет және қоғам қайраткері Кешірім Бозтаев 1989 жылы 20 ақпанда Мәскеуге, СОКП Орталық Комитетінің бірінші хатшысы Михаил Горбачевқа хат жазып, Семейдегі атом полигонын жабуды талап етсе, сол жылы 26 ақпанда Қазақстандағы ядролық жарылыстарға қарсы «Невада – Семей» антиядролық қозғалысы басталып, оны ақын Олжас Сүлейменов басқарды. Бұл бастама бүкіл әлем халқынан қолдау тапты. Осы қозғалыстың ықпалымен 1991 жылы 29 тамызда Қазақстанның Тұңғыш Президенті Нұрсұлтан Назарбаев Семей ядролық сынақ алаңын жабу туралы Жарлыққа қол қойды. 2009 жылы БҰҰ 29 та-



ҒАСЫР ҚАСІРЕТІНЕН ҚҰТҚАРҒАН ҚАДАМ

Биыл Семей полигонының жабылғанына 33 жыл, Қазақстанның ядролық қаруды таратпау туралы шартқа және Атом қуаты халықаралық агенттігіне қосылғанына 30 жыл толды. Сондай-ақ Орталық Азияда ядролық қарудан азат аймақ құру туралы шарттың күшіне енгеніне де 20 жылға жуықтады. Атом алапатынан бас тарту, ядролық қарусыз ел құру жағындағы Қазақстанның бұл қадамдары елімізді антиядролық қозғалыстың жаһандық көшбасшысына айналдырды.

мызды Халықаралық ядролық сынақтарға қарсы күн ретінде декларация қабылдады. ҚР Үкіметі 2019 жылғы 3 шілдеде №467 қаулы шығарып, 29 тамыз елімізде Семей ядролық полигонының жабылу күні ретінде атап өтуді ұйғарды. Біздің бұл күнді айрықша әспеттейтініміздің сыры, міне, осында.

Қазақстан Республикасы дүниежүзілік тарихта жойқын ядролық полигонды жапқан және жаппай қырып-жою қаруынан өз еркімен бас тартқан алғашқы мемлекет саналады. Семей ядролық полигонының жабылуы қазақ халқы қырық жыл күткен тағдыршешті шешім еді. Қазақстанның Денсаулық сақтау министрлігінің статистикалық мәліметтеріне жүгінесек, Семей полигонындағы атом бомбасы қаруын сынақтан өткізу салдарынан 1,5 миллион адам зардап шеккен. Семей қаласы мен оның төңірегінде онкологиялық аурулармен ауру көрсеткіші 100 мың тұрғынға шаққанда 263,3 адамды құраса, ұлттық көрсеткіш 184-ке жеткен.

Семей полигонында әуеде және жер бетінде өткізілген сынақтардың ядролық зарядтарының жалпы қуаты 1945 жылы Хиросимаға тасталған атом бомбасының қуатынан 2,5 мың есе көп болды. Ең аяныштысы, ядролық жарылыстар туралы халыққа 1953 жылдан бастап қана ескертіле бастады. Осы жарылыстың салдарынан Семей өңіріндегі тұрғындар түрлі ауруға ұшырап, сол сырқаттың қасіретін әлі де арқалаумен келеді. Бұл сырқаттардың тұқым қуалайтынғы ғылыми түрде дәлелденді, оның қасіреті 300 жылға дейін созылуы мүмкін деген болжам да бар. Сондай-ақ Семей полигонына жақын ау-

дандарда жетілуінде әртүрлі ауытқу, тәндік және естік кемшіліктер бар сәбилер дүниеге көп келді. Мамандардың айтуынша, соның бәрі қысқа мерзімді және қалдықты радиацияның кесірінен болатын генетикалық мутациямен байланысты. Сынықтан адамдар ғана емес, жан-жануар, жер де азап ауыр шекті. Жылма-жыл радионуклидтердің жинала беруі жердің құнарлығын азайтады. Жетпісінші жылдарға дейін зарядтар салынған штольнялар мен скважиналардың түптері мен шығар ауыздары дұрыстап бетон қақпақтармен жабылған. Соның салдарынан улы инертті газдар, ауыр металдар, басқа да радиациялық заттар жер бетіне жайылып, ауаға тарап жатты.

Қазақстан Семей полигонын жапқаннан кейін, көп ұзамай ядролық қарудан да өз еркімен бас тартып, бүкіл әлемге үлгі болды. Яғни Семей атом сынақ алаңын жабу, ядролық қарудан бас тарту тәуелсіз Қазақстанның әлемге оң қырынан танылуына



Деректерді саралағанда, 1949 жылдан 1991 жылға дейін Қазақстанда 500-ге жуық сынақ жасалып, сынақ алаңымен шекаралас аудандардағы халықтың денсаулығына, экологиялық ортаға орасан зор зиян келтірілді

тайдағы Лобнор көлінің маңы және АҚШ-тың Невада штатына – аталған мемлекеттер тарапынан мораторий жарияланған. Үшіншіден, Қазақстандағы қалған ядролық қондырғылар мен ядролық материалдардың қауіпсіздік режимі қамтамасыз етілді, содан кейін атомды бейбіт мақсатта пайдалану мүмкіндігі қайтадан қалпына келтірілді.

Демек, ядролық қарусыз әлем құру – әлемдік дамудың қажеті. Қазіргідей дамыған дәуірде жаппай қырып-жою қаруы мемлекет қауіпсіздігінің бірден-бір кепілі емес. Осы тұрғыдан алғанда, еліміздің ядролық қарусыз мемлекет құру бастамасы алқауға, қолдауға татын тамаша таңдау деп айтуға болады.

Қазақстан ядролық қарудан бас тартуы, ядролық қарусыз әлем құруды қуаттағанымен, әлем адамзатқа апат әкелетін алапат қарудан әлі күнге дейін толық бас тарта алмай келеді. БҰҰ мәліметінше, бүгінде ядролық қаруға ие 10 мемлекетте 15 мың ядролық қару сақталуда, оның жүзден астамы санаулы

минуттардың ішінде іске қосыла алады. АҚШ, Ресей сияқты елдер ядролық оқ тұмсықтарының санын азайтқанымен, әлі де көп мөлшерін сақтап отыр. Халықаралық қатынастардағы қақтығыс әлеуетінің артуына және қаржы-экономикалық қайшылықтардың күшеюіне байланысты ахуал шиеленісіп кетті. Иран мен Солтүстік Кореяның ядролық бағдарламадан толық бас тартпауы, «Ядролық қаруларды кеңейтпеу туралы шарттың» да тығырыққа тірелуі, кейбір елдердің атом қаруымен төңірегіне сес көрсетуі, ішінара елдердің ядролық қаруға ие болу жағындағы талпынысының күшеюі әлемдегі ядролық қауіпсіздік мәселесін айтарлықтай күрделенді.

Украина соғысы да ядролық қарудан өз еркімен бас тарту қадамының дұрыс-бұрыстығына болған күдікті де күшейтті. Өйткені Украина да Қазақстан сияқты атом қаруынан өз еркімен бас тартып, Будапешт келісімін жасасып, алпауыт елдерден «саған жау тисе, біз қорған боламыз» деген ант алған ел еді. Бүгінде украиндықтар сол уәде берген елдің өзімен соғысуға мәжбүр болып отыр. Оның үстіне, Ресейдің «ядролық қару қолданам» деп тұтас әлемге сес көрсетуі де әлем халқының ядролық қарусыз әлем құру сеніміне де селкеу түсірді.

Дейтұрғанмен, әлемде жүйелі тәртіп орнатып, адамзатқа апат әкелетін жойқын қарудан бас тарту және оның таралуының алдын алу адамзаттың басты міндеті болып қала бермек. Өйткені бейбіт мақсатта пайдаланса, адамзатқа бақыт, байлық әкелетін, қару ретінде қолданса, қасіретке бағыратын екі жүзді қанжар секілді бұл мәселені қашанда әлемнің тыныштығы мен бейбіт дамуы үшін пайдаланғаннан тиімді жол жоқ. Ерте ме, кеш пе, адамзат әлемі осы қадамынан басқа таңдау жоқ екенін де жете түсінеді. Бұлайша айтқанда, әлем атомға емес, түсіністікке, мейірімге зәру. Міне, осы тұрғыдан алғанда, Қазақстанның ядросыз әлем құру бастамасы бүгінгі күн үшін де, болашақ үшін де үлгі тұтар игілікті қадам деп айтуымызға әбден болады. Осы тұрғыдан алғанда, Мемлекет басшысы Қасым-Жомарт Тоқаевтың: «Бізге ядролық қару қажет емес. Себебі біз Ядролық қаруды таратпау туралы шарт пен Ядролық қаруды сынауға тыйым салу туралы шартқа қосылдық. Біз осы халықаралық құжаттар аясындағы міндеттемелерге адал болып қала береміз» деген сөзі еліміздегі 20 миллион халықтың ортақ пікірі, мызғымас ұстанымы болмақ.



ӨНЕРЛІ ОТБАСЫЛАР КОНЦЕРТІ

Астана қаласы әкімдігінің Есіл ауданы бойынша Белсенді ұзақ өмір сүру орталығында «Ұрпақтар сабақтастығы» жобасы аясында Білім күніне арналған «Мектеп және отбасы» концерті өтті.



Концертке өнерлі отбасылар, зейнеткер ата-әжелер мен олардың немерелері қатысты. Кеш шымылдығын «Тойбастар» күйімен «Асыл мұра» домбырашылар ансамблі ашты. «Сағыныш сазы» ансамблінің мүшесі Әсемхан Ескендірдің немересі Риза Арлан күй атасы – Құрманғазының «Балбырауын» күйін орындады. «Шұғыла» тобындағы Алмасбай Ерниязовтың немересі Аделя атасы жазған авторлық өлең оқыды. «Арқа әуендері» халықтық вокалдық тобының мүшесі Ғалия Мелдебекованың немересі 6 жасар Әлия, «Шұғыла» тобындағы Қабай Сейітжапардың немересі Жаннұр, осы топтағы Сағынгүл Шадрқұлованың немересі Назерке Дәулет және орталықтың өнерлі зейнеткерлері өнер көрсетті. «Қазына» салт-дәстүрді дәріптеу ұжымы басталғалы тұрған оқу жылына сәттілік тілеп, тәттілерден шашу шашты.

«АБАЙ-ТОҒЖАНМЕН» АШЫЛАДЫ

Астана қаласы әкімдігінің Музыкалық жас көрермен театры гастрольдік сапармен Баянауылға барады. Бұл сапар қазақ әдебиетінің классигі, Алаш қайраткері Жүсіпбек Аймауытұлының 135 жылдығына, ғұлама ғалым Қаныш Сәтбаевтың 125 жылдығына, қазақ археологиясының негізін қалаушы Әлкей Марғұланның 120 жылдығына, қазақ киносының атасы Шәкен Аймановтың 110 жылдығына арналады.

«Астанадан Баянауылға сәлем!» бағдарламасымен астаналық өнер ұжымы 2-3 қыркүйек күндері Ертіс-Баян өңірінің көрермендеріне «Гауһартас» музыкалық драмасы мен «Шәмші» мюзиклін ұсынады.

Театрдың жаңа V маусымы 5 қыркүйек күні М.Әуезовтің «Абай-Тоғжан» музыкалық драмасымен (инсценировкасын жасаған – М.Әбіл, қоюшы режиссері – А.Мамиров) ашылады.

Астана қаласы әкімдігінің Музыкалық жас көрермен театрының Жүсіпбек Аймауытұлының 135 жылдығына, Қаныш Сәтбаевтың 125 жылдығына, Әлкей Марғұланның 120 жылдығына, Шәкен Аймановтың 110 жылдығына арналған Баянауыл ауданындағы өнер сапары

02 қыркүйек 19:00 «ГАУҒАРТАС» /Музыкалық драма/ Авторы: Д.Исбаевов Режиссері: А.Мамиров

03 қыркүйек 19:00 «ШӘМШІ» /Мюзикл/ Авторы: М.Омарова Режиссері: А.Мамиров

Өтетін жері: Баянауыл аудандық мәдениет үйі

МӘМБЕТОВ ТЕАТРЫНЫҢ ЖАҢА МАУСЫМЫ

ӨЗБЕКЖАН МӘМБЕТОВ АТЫНДАҒЫ МЕМЛЕКЕТТІК ДРАМА ЖӘНЕ КОМЕДИЯ ТЕАТРЫ

РЕПЕРТУАР

ҚЫРКҮЙЕК

2024

| | | | | | |
|----|---|-------|--------------------------------------|-----------------------|-----|
| 02 | Д | 19:00 | Боранды бекет /драма/ | 7-ші маусымның ашылуы | 16+ |
| 03 | С | 19:00 | Сені соғымдым... /драма/ | | 16+ |
| 05 | Б | 19:00 | Қыз Жібек /лирико-опера/ | | 12+ |
| 07 | С | 19:00 | АҚАН СЕРІ /тураалы әңгізе/ | | 16+ |
| 08 | Ж | 20:00 | КҮНДЕЛІК /лирикалық кеш/ | | 12+ |
| 10 | С | 19:00 | Ауыл хикаялары-2 /драма/ | | 12+ |
| 11 | Б | 19:00 | Ауыл хикаялары-1 /драма/ | | 12+ |
| 13 | Ж | 19:00 | Чарли Чаплин /трагикомедия/ | | 12+ |
| 27 | Ж | 19:00 | ЖАДДАМАЛЫ ПӨТЕР /драмамажик комедия/ | | 16+ |
| 29 | Ж | 19:00 | БОЛМАҒАН БАЛАЛЫҚ ШАҚ /драма/ | | 12+ |

2 қыркүйек күні Ә.Мәмбетов атындағы Мемлекеттік драма және комедия театрының VII маусымы Ш.Айтматовтың «Боранды бекет» драмасымен (қоюшы режиссері – Ұ.Қарыпбаев) ашылады.

Қазақстанның халық жазушысы, Мемлекеттік сыйлықтың лауреаты Шерхан Мұртаза қазақшалаған «Боранды бекеттің» аталмыш театрда премьерасы осыдан екі жыл бұрын өтіп, КСРО және Қазақстанның ха-

лық әртісі, КСРО Мемлекеттік сыйлығының иегері, Халық қаһарманы Әзірбайжан Мәмбетовтің 90 жылдығына арналды. Содан бері оның атын иеленген өнер ошағы жаңа маусымды осы қойылыммен ашуды дәстүрге

айналдырды. «Жаңа маусымда көрермендерге дайындап жатқан үлкен премьераларымыз, балаларға базарлығымыз бар» дейді осы театрдың бас режиссері Жұлдызбек Жұманбай.

VII - ші маусымның ашылуы

02 ҚЫРКҮЙЕК

19:00 /Дс/

Боранды бекет

/драма/

Автор: Ш.Айтматов | Реж. Ұ.Қарыпбаев



КӨШПЕНДІЛЕР РУХЫНЫҢ КӨКЖИЕГІ

V Дүниежүзілік көшпенділер ойындары қарсаңында Астанада «Көшпенділер рухы: шексіз көкжиек» атты фотокөрме ашылды.

Көрмені Мәдениет және ақпарат министрлігі мен Туризм және спорт министрлігінің қолдауымен «Creative&Innovation Institute» Орталық Азияның тұрақты даму қоғамдық қоры ұйымдастырды.

Көрмеге қазақстандық Анзор Гасаев пен Александр Кузнецовтың, сондай-ақ британдық Конор Макнейл мен венгриялық Шандор Карачонның фотосуреттері қойылған. Көрмеде көшпенділер

әлемімен қауышқандай әсерге бөлейтін пейзаждар мен портреттер, сондай-ақ әлемнің түкпір-түкпірінен фотосуреттер ұсынылды. Көрме қонақтары қазақтың киіз үйінің инновациялық эко-жобасын, дәстүрлі және заманауи технологияларды қатар қолдану арқылы киіз бен жүннен жасалған бұйымдарды тамашалай алады. Көрмені Сығанақ көшесі, 60/5 мекенжайында 17 қыркүйекке дейін тамашалауға болады.

ҰЛТТЫҚ ӘУЕНДЕР – ЖАҢАША ӨНДЕУДЕ

31 тамыз күні Еркеғали Рахмадиев атындағы Мемлекеттік академиялық филармонияның концерт залында «The Nomad's fire» атты кеш өтеді.

Эстрадалық-симфониялық оркестр, халықтық және заманауи билерді біріктірген көпби ұжымы өнер көрсетіп, этно-рок, этно-джаз, этно-фанк, этно-фьюжн жан-

рындағы әуендер ұсынылады. Бұған қоса, домбыра, қобыз, жетіген аспаптарымен заманауи өңдеудегі халық музыкасы, жаңаша өңделген халық әндері әуелейді.

2024 31 ТАМЫЗ 19:00

ФИЛАРМОНИЯ КОНЦЕРТ ЗАЛЫ Астана қ., Кенесары, 32

ЭТНО-ШОУ THE NOMADS' Fire

КӨШПЕНДІЛЕР ЖАЛЫНЫ

#ethnovecal #artperformance #ethnofunk #ethnofusion #ethnorock #ethnochoreography #ethnojazz #ethnoshow #ethnojazz #ethnoshow #ethnorock #ethnochoreography #ethnovecal

7 (7172) 75 23 83 701 309 62 80

FREEDOM TICKETON

HALYK BANK Astana

visit @astana филармония

Бетті дайындаған Аманғали ҚАЛЖАНОВ